

20/03/2004

Sakit jantung tidak halang Fatimah mengundi

KUALA LUMPUR: Tun Fatimah Hashim, 80, yang kini mendapat rawatan sakit jantung di Pusat Perubatan Pantai, di sini akan tetap keluar mengundi pada pilihan raya umum, esok.

Beliau yang dimasukkan ke wad sejak Rabu lalu, tidak menjadikan keuzuran sebagai alasan untuk mengelak daripada menunaikan tanggungjawab sebagai pengundi dan rakyat Malaysia.

Fatimah adalah antara 56,422 pengundi kerusi Parlimen Lembah Pantai, akan mengundi di Sekolah Rendah Bukit Pantai, Jalan Cenderai, Bangsar di sini, kira-kira jam 10.30 pagi.

"Saya masih bersemangat untuk terus menyokong Umno dan Barisan Nasional (BN) dan malah saya akan tetap ke pusat membuang undi untuk menunaikan tanggungjawab pada pagi Ahad ini walaupun dengan berkerusi roda," katanya ketika ditemui di tingkat empat pusat perubatan itu, di sini, semalam.

Beliau yang dimasukkan ke wad selepas terjatuh sebaik selesai menunaikan solat Subuh tiga hari lalu dikunjungi calon BN kerusi Parlimen Lembah Pantai, Datuk Seri Shahrizat Abdul Jalil.

Turut menemani Fatimah di wad itu ialah anak lelakinya, Abdul Karim Abdul Kadir dan isterinya, Rogayah Mohd Ali.

Fatimah yang semakin beransur pulih sempat memberi kata-kata nasihat dan semangat kepada Shahrizat untuk menghadapi pilihan raya umum kali ini.

Beliau yang dilahirkan di Parit Keroma, Muar, Johor pernah memimpin pergerakan wanita dengan menerajui Pergerakan Kaum Ibu/Wanita Umno selama 16 tahun.

Menyorot sejarahnya, Fatimah dilantik sebagai Ketua Kaum Ibu Umno (dipanggil Wanita Umno pada 1972) pada usia semuda 32 tahun dan jawatan itu dipegang mulai 1956 hingga 1972.

Beliau juga menjadi Ahli Parlimen Jitra-Padang Terap selama 15 tahun (mulai 1959 hingga Ogos 1974) memainkan fungsi besar bersama Perdana Menteri pertama, Tunku Abdul Rahman Putra, dalam perjuangan parti dan kemerdekaan negara.

Kerusi itu kemudiannya dikenali sebagai Kubang Pasu dan diwakili bekas Perdana Menteri, Tun Dr Mahathir Mohamad.

Beliau mula berjinak dalam bidang politik apabila mendaftar sebagai ahli Umno nombor 350 pada 1947 ketika berusia 22 tahun.

Suami Fatimah adalah bekas Peguam Negara serta Menteri Undang-Undang dan Pembangunan Negara, Allahyarham Tan Sri Abdul Kadir Yusoff.

Wanita pertama menjadi menteri di negara ini yakin rakyat akan memberi mandat besar kepada Perdana Menteri, Datuk Seri Abdullah Ahmad Badawi untuk menerajui kerajaan baru BN.

Fatimah yang juga bekas Menteri Kebajikan Am antara Mei 1969 hingga Februari 1973 itu, berkata perwatakan dan penampilan Abdullah memimpin negara sejak Oktober lalu mampu mengukuhkan kedudukan Umno dan BN.

"Saya sendiri kagum mendengar ucapan yang disampaikan Perdana Menteri ketika berkempen di Terengganu, kelmarin.

"Ucapannya bagus sekali, malah sekarang baru kita tahu yang Perdana Menteri kita fasih berbahasa Arab," katanya yang tidak pernah terlepas mengikuti perkembangan politik negara menerusi televisyen dan juga akhbar.

Malah, beliau turut melahirkan rasa bimbang dengan nasib yang akan menimpa rakyat Kelantan jika mereka masih memilih calon parti pembangkang pada pilihan raya kali ini.

"Mereka tidak akan maju jika masih memilih pembangkang sebagai wakil

rakyat," katanya.